

民咸共知之肆於洪武三十一年九月初五日告于宗廟乃命以位爾其率由典章親君子遠小人視聽無一己之偏好惡公國人之論無敢或荒無敢或怠永綏厥位以昌後嗣於戲爾父薄德雖不足效先聖之道布在方冊夙興夜寐爾尚敬哉次召左右政丞亦具公服以入上曰我今傳位于世子卿等戮力輔治毋墜大業乃以傳國寶授之次命李文和陪世子以出左右政丞奉寶前導文和陪世子至勤政殿世子改服絳紗袍遠遊冠即王位受百官賀禮改諱曰暉以冕服率百官上父王尊號曰上王率百官拜賀○封德嬪為王德妃以我殿下兼判尚瑞司事閔齊三司右僕射趙璞兼大司憲李居易叅贊門下府事義興三軍府中軍同知節制使趙英茂叅贊門下府事趙溫商議門下府事朴苞知中樞院事義興三軍府右軍同知節制使馬天牧大護軍李叔蕃右副承旨○已卯有赤氣上王為芳碩等素膳都評議使司請進肉膳○移安神德王后影于貞陵○命吏曹典書李詹右諫議趙庸前知